



Un struktura di supervishon finansiero na nivel di Reino Hulandes ta impresindibel pa por tin institushonnan finansiero sano y stabilitat finansiero

Willemstad – Segun Dr. Emsley Tromp, presidente di Bank van de Nederlandse Antillen (Banko Sentral), un institushon supervisor na nivel di Reino ku ta sigui e normanan di institutonan internashonal manera BIS i IMF ta impresindibel pa logra tin institushonnan finansiero sano i stabilitat finansiero den e paisnan nobo di Reino.

E krisis finansiero i ekonómiko internashonal a saka na kla ku paisnan chikí ta mashá limitá den nan posibilidatnan pa efektuá operashonnan outónomo di reskate ora ku tamaño di nan institutonan finansiero ta grandi kompará ku nan Produkto Interno Bruto. E kaso di Icesave ta un bon ehèmpel di esaki. Desaroyonan resien tambe a demostrá ku ta un ilushon pa paisnan chikí mes determiná nan maneho di supervishon. Koordinashon i kooperashon internashonal a bira regla, guiá pa institushonnan internashonal manera BIS i IMF, ku a fiha norma pa nan miembronan. Paisnan soberano ku opta pa no sigui e reglanan akí ta kore riesgo di bai riba “black list” i asina mina konfiansa den nan sektor finansiero den nan sektor finansiero i nan klima di invershon.

P’esei, pa atendé vulnerabilidatnan di sektor finansiero, Banko Bank ke mira un struktura di supervishon finansiero den kua kada pais tin su mes institushon di supervishon, komplementá pa un institushon na nivel di Reino ku ta establese norma — *College van Koninkrijkstoelzichthouders* (Kolegio di supervisornan di Reino). E institushon akí lo mester konsistí di presidentenan di e respektivo bankonan sentral i mester ta enkargá ku preparashon di leglashon ku ta kuadra ku bon práktikanan internashonal, ehekushon oportuno di regla- i regulashonnan i kontrol di kumplimentu. Un struktura asina no solamente ta garantisá kumplimentu ku normanan internashonal di supervishon i ta krea un ambiente hustu ku reglanan uniforme den Reino, pero e lo promové tambe transparensia i kredibilidad. E areglonan di kooperashon eksistente entre e bankonan sentral di Hulanda, Aruba i Antia Hulandes por sirbi komo base pa desaroyo di un sistema firme di supervishon i pa logra tin institushonnan finansiero sano i stabilitat finansiero den e paisnan nobo di Reino.

BANK VAN DE NEDERLANDSE ANTILLEN
Jüli 2009